

Comunu de Sètimu

Citadi Metropolitana de Casteddu

Estratu de su Regulamentu de sa Bibrioteca Comunali

Art. 10

Sa bibrioteca est oberta a totus e po de badas. Is ligidoris podint castiai a solus is librus chi ddoi funt in is scafalis de s'apostu de ligidura.

Art. 11

Totus podint gosai de s'imprètidu a domu, bastit chi donint unu documentu de identidadi insoru innui funt assentaus is datus anagràficus e s'indiritzu anca bivint, chi su bibriotecàriu at a registrai.

Art. 12

Su serbìtziu de imprètidu a domu de librus e atrus documentus chi ddoi funt in Bibrioteca si podit autorizai pustis de ai compilau unu follu de iscritzioni o pustis de ai postu is datus in sa banca datus informàtica.

Po is pipius minoreddus chi no tenint ancora documentu de identidadi depint frimmai is babbus e is mammas.

A is iscritus a s'imprètidu si donat una tèssera personali chi depint presentai in dònna borta chi bollint pigai a domu librus e documentus de sa Bibrioteca.

Chi sa tèssera dd'ant pèrdia o si dd'ant furada, su meri ddu depit comunicai luegus a is ufitzius de sa Bibrioteca e aintru de 30 diis ddis donant una còpia.

S'utenti chi gosat de su serbìtziu de imprètidu depit comunicai luegus càmbius de residèntzia.

Is documentus chi pigat a imprètidu s'utenti de sa bibrioteca no ddus podit imprestai a atra genti.

S'imprètidu a domu si fait cumentu sighit:

- a) Si podint pigai a imprètidu duus documentus in dònna borta (librus VHS, etc.)
- b) Is librus si podint tenni in domu 15 diis e candu est acabbau su tempus de s'imprètidu si podit rinnovai, po telèfunu puru, po atras duas cidas, chi in su interis s'òpera no dd'at prenotada atra genti.

Is videocassetas si podint tenni in domu sceti po duas diis.

Po abisòngius chi depint èssiri motivaus, si podint donai derogatzionis a su nùmeru màssimu de documentus de pigai a imprètidu e de su tempus chi durat s'imprètidu.

- c) S'utenti chi torrat s'òpera o unu documentu pigau a imprètidu cun dannus materialis, o ddus perdit, ddus depit cambiai cun una còpia oguali a cussa dannegiada o pèrdia. Chi s'òpera o su documentu no s'agatant prus in cummèrciu, s'utenti est obbrigau a comporai una pubblicatzioni cun su pròpiu argumentu e su pròpiu valori; su Responsàbili de sa

Bibrioteca podit, in situatzionis particularis, decidi de pigai solutzionis differentis.
Sa Bibrioteca no si pigat responsabilitadis de inconvenientis chi iant a podi sucedi a is aparèchius de is utentis degada ant imperau is videocassetas, dvd, etc.

No si podint donai a imprètidu:

- a) Is enciclopedias, is ditzionàrius, e totus is òperas de consultatzioni;
- b) Is librus chi si imperant de prus in s'apostu de ligidura;
- c) Is fascìculus de is giornalis periòdicus e de is rivistas.

Su bibliotecàriu podit derogai, candu serbit, a is dispositzionis giai arremonadas innoi apitzus.

Art. 13

In sa Bibrioteca si podint fai còpias de is librus e de su materiali documentàriu, arrespetendi is normas de lei chi pertocant su deretu de is autoris e foras chi nci siant acàpius giurìdicus chi interessant a una còpia particulari.

De is documentus chi sa Bibrioteca tenit si podint fai còpias sceti pustis chi su bibliotecàriu at donau su permissu.

Sa Giunta Comunali decidit sa tarifa po is fotocòpias, po sa stampa de is datus, testus, etc, chi sa Bibrioteca tenit in formau eletrònicu e po atrus tipus de reproduidura no arremonadas in custu regulamentu.

Is tarifas po is fotocòpias e sa reproduidura imprentada de datus o testus in cd-rom partint pustis de sa de ses fotocòpias fatas o follus imprentaus.

Is utentis chi bollint reproduci in floppy disk datus o testus chi tenit sa Bibrioteca in cd-rom, depint imperai is floppy chi ddis donat sa Bibrioteca etotu e ndi depint dorrai unu chi no siat formatau.

Innantis de reproduci su materiali documentàriu de sa Bibrioteca tocat a èssiri securus ca totu su procedimentu no fetzat dannus a su materiali chi si depit reproduci.

Art. 14

Is ligidoris depint arrespetai s'assèliu e su decoru de sa Bibrioteca, cumportendisi po no strobai s'atra genti chi nci podit èssiri ligendi o studiendi e depint donai atenzioni po no fai dannu a is librus e totus is cosas chi funt de sa biblioteca.

Is impieghaus chi traballant in biblioteca nci podint bogai totu cussa genti chi no arrespetant is normas de cumportamentu arremonadas innoi apitzus.

Art. 15

S'utenti ndi depit torrai su documentu pigau a imprètidu aintru de sa di stabilia de custu regulamentu e assentau in su follu aposta, foras chi nci siant impedimentus chi a dònna maniera si

depint comunicai aintru de seti diis chi est scadia sa data chi si depiat torrai su documentu pigau a imprèstidu.

De sa de otu diis pustis de sa data chi est scadiu s'imprèstidu, chi no s'est arriciu avisu perunu de s'utenti, at a benni applicada una machìtzia in dinai po dònna di de retardu, stabilia de sa Giunta Municipali.

Pustis de trinta diis chi est scadiu s'imprèstidu, a s'utenti s'at a mandai una cartolina de apretu cun sa data ùrtima de ndi torrai su documentu pinnigau, impari a su totali de sa machìtzia de pagai; passada cussa data puru su documentu s'at a cunsiderai no torrau e s'Amministratzioni ndi dd'at a torrai a pinnigai e s'at a fai pagai sa machìtzia cun is normas de Lei chi podit imperai.

S'utenti incumpridori no at a podi pigai a imprèstidu a domu prus nudda po duas bortas su tempus chi no at torrau su documentu.

Su Responsàbili de sa Bibrioteca podit decidi de no donai prus a imprèstidu, po pagu tempus o po sempri, a un'utenti candu:

1. Is documentus pigaus a imprèstidu ndi ddus torrant in dònna borta pustis meda da sa data de scadèntzia;
2. Is documentus pigaus a imprèstidu ndi ddus torrant cun dannus.

Art. 16

(Mediateca)

Podint gosai de intrai in Internet totus is utentis chi tenint sa tèssera cumentu funt iscritus a Bibrioteca. Su Serbìtzius est po de badas.

Po podi imperai is postus tocat a domandai a is operatoris de sa Mediateca.

In su postu nci si podit stentai po no prus de trinta minutus.

Si podint scarrigai datus in dònna frommau (in paperi e no).